

MANCANZA DI RISPETTO A PATRI E MAMMA

Chianci la mamma cu cori appinatu
dicennu: “Semu persi lu maritu!
Li nostri figghi n’ hannu abbannunatu,
pi nui lu munnu si trova finitu.
Dopu chi a sangu e latti l’haiu stintatu
quantu forti duluri emu subito:
ora chi semu iunti senza ciatu
lu stessu sangu nostru n’ha’ traditu”.

Di sti genti ci n’esti un muscuvitu,
chista è un’idea peggju di l’armali;
giovani d’oggi furmaru un partitu,
finiù lu beddu affettu naturali.
Lu vinu d’oggi è quasi tuttu acitu,
cu’ si lu vivi ci fa troppu mali;
quannu la mamma e patri è dipiritu
li ettanu nta ‘u funnu di spitali.

Mia cara gioventù, abbassati l’ali,
pensu cu’ tuttu voli nulla atteni;
sèntiri vi vuliti ginirali,
faciti tuttu soccu vi cummeni.
La superba si parti, pocu sali,
ci voli carma cu senza sireni;

la leggi di Cristu esti riali,
diversi leggi d'ora pocu beni.

Varca pirdisti timuni e li veli,
lu marinaru 'un ci la fa a guidari;
la varca porta tanti passeggeri,
si trova sbandata in altu mari.
Nun la guidannu giusta chi succeri?
'N periculu la varca d'abbuccari,
mentri s'accorgi un turpitineri:
"Amici, mi capiti a lu parlari?".

Nun è di tutti sapiri guidari,
la varca è bedda, 'un è giusta guidata;
quannu chi un patri 'un sapi cumannari
c'è tutta la famigghia ruvinata.
Li figghi cumencianu a sbantari,
ognunu pigghia la so mala strata;
dimocrazia ti vogghiu baciari,
cerca abballari giusta la sunata.

Haiu parlatu onestu di famigghia:
ci voli forti capizzuni e brigghia.

PÈCURI SENZA PICURARU⁵

Lupa, liuna, tigrì e gattupardi
sunnù senza tistali a a la campìa;
fannu dammaggiu forti a miliàrdi,
ormai traseru nta la massarìa.
Lu picuraru nta lu focu àrdi,
si scanta, si spaventa e si cantìa;
si nun li freni ss'armali testardi
quarchi nuttata si mancianu a tia!

Difficili chi carma ssa timpesta:
lu pisci feti sempri di la testa!

⁵ Pubblicata nell'Antologia Poetica del Gruppo San Michele - settembre 1986.

TRASU 'N PARADISU

Passu muntagni, chianuri e timpuna,
parlu di mmernu, estati e primavera,
puru parlu di celu, terra e luna,
puru di mari e suli, grossa spera.
Pi mia campari vecchi è na furtuna,
ricorda e canta qualchi passatera;
veni la morti: è idda la patruna,
quannu ni chiama cancia la bannera.
Si l'anima nostra 'un porta farsu pisu,
Gesù ni bacia e trasu 'n paradisu.

SENTU CANTARI SPISSU TANTI ACEDDI

Sentu cantari spissu tanti aceddi,
càntanu risignoli e li cardiddi,
càntanu puru li calannareddi,
sunnunnu 'mmiscati fra cucchi e curiddi;
càntanu carcarazzi e li sturneddi,
ognununu canta a piaciri d'iddi,
ma c'è calannaruna troppu beddi:
vannu a cantari supra di li stiddi!

Viu spissu 'n aceddu li luntanu,
pi mezzu di la senza m'è vicinu;
'n mezzu l'àutri aceddi fa baccanu:
si senti aviri un cantu troppu finu.
Sfida tutti l'aceddi chi c'è 'n chianu,
lu dici chiaru e tunnu di cuntinu;
si senti di cantari lu supranu,
nun viri né muntata e né pinninu.

Pòviru merlu, p' 'un sapiri fari
s'ha' fattu quasi sempri cinsurari!

SOGGIRA E NORA⁶

Sòggira e nora fannu sempri liti,
scinneru di lu celu sciarriati;
la curpa esti chiossai di li mariti,
na pocu su' citrola abbivirati.
Tutti d'accordu mentri chi su' ziti,
si fannu assemi li beddi manciati;
poi doppu maritati li viriti
pugna nta l'occhi e capiddi tirati.

Sòggira e nora vicinu 'un abitati,
cunsigghiu chistu pi la parti mia;
è stòria vecchia di l'antichitati:
tenu, tra iddi, forti gilusia.
Perciò cummeni stari siparati,
ognuna sta sulidda e 'un si sciarria;
dui crocca masculini sparagghiati
pi forza aviti a farì vucciria.

Soggira e nora, fatti la quasetta:
lu sangu è sangu e lu broru si jetta!

⁶ Pubblicata nel numero unico ciclostilato in proprio dal Gruppo Poetico San Michele.

TIMPUNI LUZIANU

Musa, tisoru, dunami na manu,
nun mi lassari nta lu me caminu;
bisognu caminari pianu pianu,
c'esti la muntata e lu pinninu.
Jò sugnu un cittadinu busetanu,
mi sentu onestu, 'un sugnu malantrinu;
parlu di lu Timpuni di Luzianu,
lu nostru specchiu, lu nostru iardinu.

Di Busetu Centru esti vicinu,
'ntornu seicentu metri di distanza;
ci voli 'mpegnu d'ogni cittadinu
criari na pineta d'impurtanza.
Busetu Centru soffri di cuntinu
l'acqua nta lu mmernu si ci avanza:
buscagliannu Timpuni Luzianu
Busetu si manteni asciuttu e sanu!

Amici chi abitati a Luzianu
diversi aviti cunti a lu timpuni,
vi pregu a tutti cu lu cori 'n manu,
ciditici la terra a lu Cumuni:
È un beni pi tuttu busetanu,
ni parla puru la scola Manzuni;

poi vennu turisti di luntanu:
nasci un cummerciu cu tanti pirsuni.

C'esti puru vicinu Bummuluni,
c'è na pineta ch'è na maravigghia,
infatti si viri ogni staciuni
tanti turisti di ssa strata pigghia.
Nun c'è risettu ancora a ssi pirsuni,
nun si tratteni nessuna famigghia;
a stu momentu ssu beddu timpuni
ci abitanu l'aceddi e li cunigghia.

'Nsumma un discursu lassu e nautru pigghia:
avemu puru lu Voscu Scuraci,
vennu turisti cu la so famigghia,
lu voscu è beddu, nun ci dispïaci!
Pòrtanu tanti beni e la rarigghia,
ognunu mancia cu lu cori 'n paci;
c'è cu' ci havi lu figghi e cu' la figghia,
vita muderna cu carizzi e baci!

VINCI LA NATURA

Cu la leggi di Diu la cuntrarisci
si trova sempri nta lu misci masci;
cu nta stu munnu onestu e bravu crisci
Gesù l'aiuta, l'accumpagna e pasci.
Ma l'anima dannata nun capisci,
nenti ci 'mporta si la porta spasci;
vinci la natura, mai fallisci:
è veru chi pueta si ci nasci!
Si c'è quarcunu chi fa eccezioni
su' prontu a fari li votazioni!

A LU DUTTURI CANNILA

Dutturi, tu pi mia si' nàutru Diu,
lu giuru onestu fra Gesù e Maria;
ni provu gioia quannu chi ti viu,
pigghia suspiru la pirsuna mia.
Lu beni chi m'haj fattu pensu e criu,
mi scanzi quarchi brutta malatia;
sta vota la to scenza m'arricchìu:
fu a tagghiu di na bronchi purmunìa.

Ma comi vosi Diu e la to scenza
Sèttimu godi di saluti e penza.

Caru Cannila, si' riccu d'amici:
biniritta to matri chi ti fici!

Buseto Palizzolo, 15.10.1986

BATTI LA LINGUA DUNNI 'U DENTI DOLI

Batti la lingua dunni 'u denti doli,
pensu e ripensu li tempi passati;
rassignari sta menti nun si voli,
viu e sentu li cosi canciati.
Epichi muderni birbantoli,
troppu luntanu di la dignitati;
ci lu 'nsignanu puru nta li scoli,
crisci la giuvintù mali 'mparati.

Si sbagliu, prufissura e scinziati,
dicitimillu 'n facci, nun m'affennu;
restu cuntenti si telefonati,
siddu parlati giusti jò vi apprennu,
però ata stari attenti, nun sbagliati,
di ddu picca chi sacciu mi difennu;
di la "a" fina a la zeta vastasati:
e viva viva stu munnu modernu!

Jò sugnu democraticu cristianu:
scusati: dati troppu larga manu!

CU' PRIMA 'UN PENSA L'URTIMU SUSPIRA⁷

Èsseri priviggenti è na fortuna,
'mprise e superba nun s'accanza nenti;
sunnu precisi lu sulì e la luna,
raloggiu naturali eternamenti.
Gesù li nostri sbagghi li pirduna,
però l'umanità è differenti.
Amici, esaminati sta canzuna:
jò parlu di li nostri sentimenti.

Pensa la cosa prima chi la fai
chi la cosa pinsata è megghiu assai!

⁷ Pubblicata nell'Antologia Poetica del Gruppo San Michele - agosto 1985.

L'ACEDDU CHI CANTA ANCORA (a 73 anni)

Ci haiu l'aceddu meu chi canta ancora,
canta di mmernu, estati e primavera;
sta sempri nta la aggia e 'un nesci fora,
si viri carciaratu e si dispera.

Vurria cantari cu l'aceddi d'ora
moderni, libertà, a nâtra manera.

Aceddu, ascuta a mia, a mezza palora:
canta suliddu e porta la bannera.

Nun stari 'n mezzu a ss'aceddi testardi.
Si soli diri: "Cu' è liccu si ardi!"

Buseto Palizzolo, 22 .02.1986

DIBATTITU FRA LATRU E L'OMU ONESTU⁸

Parla lu latru contru l'omu onestu
dicennuci: “Ti trovi fora strata!
La sira tardu e la matina prestu
travagghi, sceccu, doppïa jurnata!
Si strapazzatu e nun camini lestu,
mi pari na ciuccazza ‘mpasturata!
Jò latru ci nascivi e mi ci vestu:
mi armu a arrobbu tutta la nuttata”.

Rispunni l'omu onestu: “L’hai sbagghiata,
pi mia è chissa la strata chi ‘un spunta!
Megghiu travagghi a cammisa surata,
nuddu ti spara e nuddu ti rifrunta.
Ascuta a mia, ànima dannata,
è la sincerità chidda chi cunta!
Si ‘ncontri quarchi niura nuttata
lignati amari e scannatu pi junta!”.

Amici, parlu su l’esperïenza:
latru, fatti l’esami di cuscenza!

⁸ Pubblicata nell’Antologia relativa al 1° Raduno Poetico “Strafarcello ‘98” del 5 luglio 1998.

JIRI A LA SCOLA DOPPU VECCHIU

Sugnu ‘n mezzu l’ancùnia e lu marteddu,
la curpa è sulu mia, d’àutru nuddu;
jivi a la scola nicu picciutteddu,
fici la terza e nàutru pizzuddu.
Ora chi sugnu juntu anzianeddu
‘n mezzu la terza media mi cafuddu.
Prisirenti, mi levu lu cappeddu
chì lei canusci l’anticu marzuddu.

Prèsidi e profissura, parlu chiaru:
ci haiu settantaduanni e ancora ‘mparu!

LU SPERTU MORI 'N MANU DI LU FISSA⁹

Ci haiu na jatta ch'è na maravigghia,
sfurtunatu lu succi chi ci 'ncagghia;
l'afferra pi lu cozzu e l'assuttigghia,
lu strinci forti nta la so tinagghia.
Lu succi mori e chiù nun s'arruspigghia,
fa succannati, pari chi baragghia;
finù manciari picciuna e cunigghia:
lu malu ferru pi la mola squagghia!

⁹ Pubblicata nell'Antologia Poetica del Gruppo San Michele - settembre 1986.

L'OMU MMIRIUSU¹⁰

Nun c'è chiù tintu di lu mmiriusu,
passa la vita sempri dispiratu;
si senti sempri lu cori cunfusu,
nun metti mäi na lira di latu.
Talia a chiddu riccu chiù pumpusu
e si dispera ch'è bonu attrizzatu
dicennu: "Sugnu scarsu piatusu,
jò sulu ci nascivi sfurtunatu!".

Rispunni l'omu chiù avvantaggiatu,
ci dici saggiu saggiu: "Ascuta a mia,
jò puru li me' guai l'haju passatu,
mi votu sempri cu Gesù e Maria!
Travagghiu onestu 'nsina chi haiu ciatu
pi sustintari la famigghia mia
e tu, misiràbili e dannatu,
travagghi picca e teni gilusìa!".

Si nun lu sai ti 'nsignu la via,
ti 'ntirizzu li strati chiù sinceri:

¹⁰ Pubblicata nell'Antologia relativa al 2° Raduno Poetico "Strafalcello '99" del 4 luglio 1999.

travagghia senza mmiria e né pazzìa,
ti trovi a postu a tutti 'i cantuneri;
ma si nascisti cu ssa malatia
nessunu ti lu leva ssu pinseri,
però s'accetti la cunsurta mia
si nominatu un scertu cavaleri!
Si lu cunsigghiu meu nun voi ascutari,
rivinci la natura, 'un c'è chi fari!